



Պարույր Սևակ

Գովերգում եմ

Գովերգում եմ այն խարույկը, որ բնա՛վ չի մտահոգվում,
թե իր մահն է իր իսկ բոցը:

Գովերգում եմ ես այն մորը,
որը

ծնում և չի հոգում,

Թե ո՞ր պիտի տեղավորի առանց այն էլ նեղ սենյակում
նորածընի օրորոցը:

Գովերգում եմ ես այն օրը,
որը

գալիս

ու տալիս է,

Ինչ երագել-տենչացել են ձիգ տարիներ:

Գովերգում եմ ես այն նորը,
որը

ոչ ոք չի հորինել...

Գովերգում եմ ես այն լավը,

Որ մեռնում է նրա մասին չցավելուց,

Եվ այն ցավը,

Որ ծնվում է շատ սիրելուց.

Եվ այն սերը, որ ո՛չ կույր է,

Ո՛չ էլ՝ դիտմամբ՝ ակնոցավոր.

Գովերգում եմ և այն լուսե գաղափարը,
Որ չի դառնում նեղ կաղապար.
Այն կասկածը, որ ծնվում է հեզնող ցավով,
Հետո դառնում մի անկասկած ճշմարտություն
Ու բաց անում նոր ճանապարհ...
Գովերգում եմ այն երա՛շտը, որ մղում է ջրանցք շինել,
Այն ջրա՛նցքը, որ չի շինվում արյան գնով,
Այն արյո՛ւնը, որ թափվելիս գուր չի թափվում,
Այն թափվե՛լը, որ վերստին հավաքվելու հնար ունի,
Այն հնա՛րը, որ չի խաբում,
Այն խաբե՛լը, որ մղում է չեղած ճիշտը որոնելու,
Որոնո՛ւմը, որ ի վերջո չի հասցընում մոլորումի,
Մոլորո՛ւմը, որ ականա վերջանում է մի նոր գյուտով...
...Եվ, վերջապե՛ս, գովերգում եմ գովերգումը:
Թող բա՛ն լինի գովերգելու...

20, 25.V.1957թ.

Մոսկվա